

Sunday, July 5, 2026

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



FORMER MINISTER

Mizoram sorkara cabinet minister hlui Pu F. Malsawma chu nizan khan a thi a, kum 78 ani.

Larsap General VK Singh chuan, Mizoram Minister hlui, Pu F. Malsawma , a kal ta chu pawl a tih thu a sawi a. Mizoramin hma lam a pan theih na’n leh hmasawnna atâna a thawhrimna leh a inhlâna zawng zawngte chu zahawm a tih thu sawiin, hriat reng a ni tawh dâwn ani a ti.

Chief Minister Pu Lalduhoma pawhin sunna thu sawiin, Pu F. Malsawma chu Ram hrulaitu tha, mi retheite hmangaih em em thin, nungchang mawi tak a ni a ti a. Kum 1978-ah Suangpuilawn bial atangin MLA ah thlan tlin a nih thu leh, 1979 a inthlan a awm leh khan a bial ngai atang hian tling lehin ,Minister mawhphurhna pek a ni a. Khatihlaia India rama Minister naupang ber zinga mi a ni tih sawiin, Mizoramah remna leh muanna a awm theih na’n Minister a nihna a bansan a a ti a, remna leh muanna a awm theih na’n a theihna zawng zawng a chhuah a ni ati.

Home Minister Pu K. Sapdanga, Health Minister Pi Lalrinpuui leh Adviser to Chief Minister Pu TBC Lalvenchhunga te pawhin social media kaltlangin Pu F. Malsawma an ui thu leh an chhungte an tawrhpuui thu an sawi bawk a ni.



HOSPITAL SUNDAY

Vawiin hi Mizoram Presbyterian Kohhran ni pawimawh 'Damdawi In Pathianni' (Health Sunday & Hospital Sunday) a ni a, kohhranhote’n hun ruat bik an hmang.

Chawhnu inkhawmah 'TB Natna' thupui ngaihthlak a ni a, zan inkhawmah 'Hliam tuarte tana Samari mi tha nih' tih chu ngaihthlak a ni ang. Durtlang a Synod Hospital chuan sorkar tangka kum (financial year) liam ta 2025-26 chhung khan Synod Hospital-a awm man pe thei lo leh pe tla thei lo mi 779-te chu cheng vaibelchhe 2 leh nuai 31 chuang a peksak a; chung zinga za zel a 33 point 67,mi 256-te chu Presbyterian kohhran mi ni lo an ni.

Kum 1985 Synod Inkhawmpui thu angin kum 1988 atang khan January Pathianni hnuhnung ber chu Phâr Pathianni (Leprosy Sunday) atan hman thin a ni a. Kum 2004 Synod chuan phâr pual chauh ni lovin natna dangte pawh huamin 'Health Sunday' tiin a thlâk a. Kum 2010 July Pathianni hmasa ber atangin Health Sunday hi hman tan a ni a. Health Sunday-ah hian Hriselna lam thupui chi hrang hrang zir thin a ni.

He tih lai hian Mizoram Baptist Kohhran chuan vawiin hian Mission Sunday an hmang ve thung a. Mission chungchang infuihtharna leh report ngaihthlakhona atan hman a ni.



CEO, POL. PARTIES

Mizoram puma Special Intensive Revision (SIR) 2026 kal mekah Draft Electoral Roll hlawhtling taka nimina tlangzarh pualin Chief Electoral Officer Pi Garima Gupta chuan political party hrang hrang aiawhte I&PR Conference Hall, Lianchhiari Runah a kawm.

CEO chuan political party te, official te, a hmun tak taka thawktu BLO leh BLA te thahnemngaihna leh thawhrimna avangin Mizoramah SIR 2026, Enumeration Phase hlawhtling taka kalpui a nih thu sawiin, SIR thawhthumna kalpui mektu State 16 leh UT 2 te zingah Mizoram chu digitisation za ah za zo thei hmasa ber a ni, a ti. Draft Electoral Roll tarchhuah chu mipuiin an ngaihven a ngai hle, tih sawiin political party tin te tanpui turin a sawm a. Vote nei thei zawng zawngin vote an neih ngei na tur leh vote nei thei lo te hming paih a nih theih na'n inthun thar, paih leh siamthat (Claims & Objections) hun hi nimin July ni 4 atanga intanin August ni 4 thleng kalpui tur a ni a ti a, he hunah hian mi tinte uluk taka Draft Electoral Roll lo endik tura chahin. Hmaih palh emaw, kum tling thar inthunthar duh emaw, tih dik loh awm palh emaw siamthat hun lai a nih avangin ngai pawimawh turin a ngen a ni.

Political party te pawhin SIR 2026 kalpui mek chungchanga an hmuh dan leh ngaih dan te, tha taka kalpui a nih avanga lawmawm an tih thu te an sawi a.

